

Merr kann auch ohne Navi Auto fahren

Gestern hatt michs Kättche oogerufe. Honnes, hottse ins Telefon gekrische, Honnes, heit hotter endlich dess Ding fortgeschmisse. Du glaabst joo nit, was ich die letzt Zeit dorchgemacht habb, alls weeche dem Dreckding. Ich ...

Jetzt emol langsam, habb ich se unnerbroche, ich waaß garnit von was du redde dust. Erzähl merrs emol gonz langsam, was issen dess ferr e Ding, was de Schorsch fortgeworfe hott?

Ei soin Navi, hottse ze Antwort gewwe, soin Navi hotter fortgeschmisse, Gottseidonk.

No, saach ich, der hott doch bestimmt was gekost, unn jetzt schmeißt derra fort. Was issen bassiert?

Honnes, hottse gesaat unn e bissi debei geflennt, der Monn hott mich uffgereecht. Wenn der mettem Auto zum Becker Scherer gefahrn iss, hotter dess Ding oogemacht, unn wanner uff de Kerchhof gefahrn iss, hotter dess Ding auch oogemacht, unn wenn merr zwischedorch gehalte hawwe, hotter dess Ding aus- unn widder oogemacht. Glaab merrs, die Spillerei von dem hott mich ferdischgemacht. Schorsch, habb ich gesaat, du brauchst doch hier in Flerschem den Navi nit oozemache, du kennst doch de Weech. Awwer naa, alsfort hotter onn dem Ding herumgespillt, ich wollt schunn gar nimmi mettem fortfahrn. Unn alls die Stimm beim Oomache, von sooner Fränzösin: Isch abe Ihre Rute gefunden! Unn wanner mol falsch gefahrn iss hott die gesaat: Oh lala, das aben wir aber zu ändern! Unn jedes Mol wenn die was gesaat hott, iss de Schorsch gonz nervees uff soim Sitz hin unn her gerutscht. Unn irchendwonn iss merr e Licht uffgonge, was der Schorsch onn dem Navi hott, dess war die Stimm von der Fraa. Doo habb ich so enn Zorn kriecht, habb gleich unsern Sohn oogerufe unn habb dem die Sach verzählt. Mudder, hotter gesaat, dess kriehn merr, weil doo sinn siebzeh verschiedene Stimme druff, ich änner dess. Unn wie de Schorsch enn Daach später de Navi oogemacht hott, war doo so enn hessische Schlechtbabbeler druff, der hott beim Fahrn Tipps gewwe ferr die Wertschafte links unn rechts, unn wenn de Schorsch emol falsch gefahrn iss, hotter geschennt: Du Olwel, jetzt bisde falsch, dreh erum! Dem Schorsch hawwe merr gesaat, dess iss in dem Navi droi, alle Monat gibts e onner Stimm, unn dess hotter auch geglaabt. Mett dem Schlechtbabbeler wollter schunn nimmi so oft fahrn unn hott den Navi meisdens aus gelosse. Als oofongs August unsern Sohn die Stimm widder umgestellt hott, dann wars aus. Jetzt hadd de Schorsch genuch vom Navi. No, habb ich gefroocht, was war dess ferr e Stimm?

Ei, moonts Kättche unn jetzt hottse gelacht, dess war so e Stimm, ich habb gesaat, dess iss die Stimm von so emm mittelständische Politiker. Weil immer wenn der gesaat hott: Nach rechts abbiegen!, odder: Nach links abbiegen!, doo hosde gemerkt, der hatt geeche rechts unn links enn rischdische Abscheu. Unn wenn de Schorsch emol falsch gefahrn iss hotter mett so emm Schmelz in de Stimm gesaat: Bitte wenden!, dass de Schorsch gradaus weidergefahrn iss unn gesaat hott: Naa, bei dem wend ich mich nit, wer waaß was der dann mett merr oofängt. Unn deshalb hotter gestern gemoont, er kennt ab jetzt auch ohne Navi Auto fahren unn hotten fortgeschmisse. Jetzt geht merrs besser.

Kättche, habb ich gesaat, dann machst in Zukunft du de Navi. Unn wennde dann so e bissi schmeichele dust wie die Fränzösin, dann willer koon onnern mehr hawwe.

Eiern Honnes